


DAULLET E NJË NATE

---

ADEM ZAPLLUZHA

*DAULLET E  
NJË NATE*



Copyright@Adem Zaplluzha-2013

Konsilier editorial :

**Halil Haxhosaj**

Redaktor: **Baki Ymeri**

Lektor: **Veli Veliu**

Recensent: **Mazllum Baraliu**

Ballina: **Laura Rushani**

Redaktura teknike: **Botuesi**

\* \* \*

*Edhe ky libër del në dritë në kuadrin e Shoqatës së  
Shkrimtarëve “Fahri Fazliu” - Kastriot*

**ISBN 978-9951-664-01-1**

DAULLET E NJË NATE

---

ADEM ZAPLLUZHA

# DAULLET E NJË NATE

Shoqata e Shkrimtarëve  
“Fahri Fazliu”  
Kastriot, 2014



## ***DAULLET E NETËVE KOSOVARE***

Adem Zaplluzha duket si një gurrë e pashtershme e frymëzimeve lirike të mveshura në tesha të mëndafshta. Në vargjet e tij dremisin lulet e saksisë si një magjepsje e gërshetuar me pëshpëritje zogjsh që depërtojnë tejmatanë perdeve, duke të ftuar për një dremitje të ëmbël, ngase gjumi e ka kapluar lulishten e shtëpisë. Kosova me zogjtë, gështenjat, lulëkuqet dhe varret e dëshmorëve dremit. Në kuadrin e ciklit të parë, Sonte nuk dua të vdes, autori provon të luajë sonte fatin e zogjve. Ajo që ngjan me ajrin, duket si një ishull mes mjegullave. Ishulli i uritur dhe i etur si zogjtë e shkretëtirës. Dhe më tej:

“Rëra fluturon përtej mendimit/ Një kaktus i etur/ Pi ujë në shpirtin e rërës/ Dielli si në copë gacë e përskuqur/ I pjek zogjtë në fluturim e sipër. Netët kosovare zalisen në zërin e mullinjve, kur kjo dunë prej vezëve të breshkës, me gjasë paska mbetur, si një varr i vetmuar: “Një arkivol i hirtë/ Te një varr i panjohur/ I kreh flokët e thinjura të zjarrit”, tejmatanë kufirit të kujtesës. Kur përmes pëlhurës së grisur të një anijeje, shpërthen kureshtja dhe guri i mullirit të duket si një blanë mbretërore, kur stina si syri i verbër i hënës, shikon tejpertej galaktikave, rritjen e një shelgu të pikëlluar. Autori zgjohet “Përtej kujtesës/ Si nga një

ëndërr e trishtë”. Prej vezëve të thyera dalin çafkat, kurse qielli i mbuluar me pupla njerëzish, hingëllon si kali i sëmurë. Universi, imagjinata, tropet dhe figurat tjera stilistike nuk mungojnë, as atëherë kur Adem Zaplluzha, përtej parmakëve të dritares, sheh djersitjen e ajrit: “Te dhoma e pritjes/ Një shpend krahmadh/ Është ulur pranë kujtesës/ Dhe i ëndërron/ I kjet e kota të stinëve”.

Shqiptarët, sipas tij, ishin me gjasa të parët, që e gjetën zjarrin, “Por mishin e pjekur e hëngri nata”. Dhe më tej: “Kur dëgjuam kushtrimin/ Tupanët veç ishin shurdhuar/ Nëpër mëhallë/ Bredhin ardhacakët e dehur/ Dhe i recitojnë do psalme të vjetra/ Në një gjuhë të huaj/ Që s’na përket neve”. Ne dënesëm një kohë të gjatë, thekson autori, dhe shton se me një ngashërim të padëgjuar deri atëherë, dëneste edhe kori i bretkosave: “Por vaji i jonë/ Më duket edhe sot/ Se i përngjante lutjeve të erës”. Vargjet e Adem Zaplluzhës duken si do këngë djepi në bibliotekën e sentimenteve letrare. Nën gurin e mullirit vërtiten shpresat dhe aspiratat, kur ti e përkujton zërin që e bluan romancën e ditëve të nesërme. Në vargjet e tij dremisin, madje, edhe shikimet ndaj yjeve, madje edhe ti, përmes kandilit që e përkund dritën e gjumit, kurse gjumi yt duket më i qartë se pa skajshmëria, në kohën kur: “Lëkura ime e grisur/ Shtatë herë u shit sot në treg/ Dhe herën e tetë/ U konvertua në hartën e Atdheut”.

Shqiptari i Kosovës nuk din të ndalet, sepse fjalët e tij kanë filluar t'i përngjajnë kristaleve të borës. Herë janë të ftohta si njerëzit, herë u përngjajnë eshtrave të elefantëve, e herë arkivoleve të kalbura: “Do dalim si gjarpri nga lëkura/ Do e grisim ëndrrën e posa nisur/ Te ky gur që nuk i përngjan as murit/ Do i mbjellim krahët e zogjve”. Nuk kemi kohë për fluturime të reja, thekson autori: “Me mija vjet fluturuam/ Dhe asnjëherë nuk e mbërrimë cakun/ Sonte do të mendojmë pak më ndryshe/ Për itinerarin e kësaj udhe// Do ecim tejprtej arsyes”. Pse? Sepse nuk ka ndalje në këtë rrugë, dhe po që se ndalemi, kurrë më, nuk do të mund ta prekim, ëndrrën tonë të posa nisur. Problemet e stilistikës letrare e angazhojnë kritikun të trajtojë krejt lëndën poetike, kurse ne e anashkalojmë këtë “porosi”, duke analizuar vetëm poezitë e para, për të nxjerrë në pah të vërtetën, se kemi të bëjmë me një veteran të mirëfilltë të poezisë së sotme në Kosovë.

Më 30 korrik të këtij viti (2013), autori thekson me fjalë identike, se sonthe është koha, të cilën e kemi pritur me mija vjet, dhe do të nisemi, atje poshtë te ledhnajat e historisë, ku na presin do punë posa të nisura. Dhe papritmas fanitet një re e dendur: “Më lëshoni”, se “Sonte dua të dal/ Nga klishtët e së kaluarës/ Do hyj në labirintet e kësaj kohe/ Dhe si nëpër tregimet fantastike”, do të kaloj në anën tjetër të lumit, në secilën degë të kësaj peme, do mbjellim nga një domethënie, kurse më

pastaj do të ecim, deri te sinorët e luadheve: “Koha është/ Për kositjen e barit të njomë// Nëse vonohemi/ Për udhëtimin deri te baladat/ Nëpër rrugët e metropoleve do i kërkojmë/ Pendlat e ndukura të zogjve/ Që mbetën peng i një tjetër kohe”. Vargje brilante që shëmbëlajnë me perëndimin e Ballkanit të çmendur, dhe një stinë të re, kur, herë shqepen e herë ngjiten hartat, kur një re e dendur, asnjëherë nuk i ndryshon itineraret. autorin e ngazëllen fillimi i mirësisë dhe mbarimi i ligësisë. Ai ëndërron për zogjtë e erës dhe paskajshmërinë e lumturisë. Sipas tij: “Këto gjëra që po i preki sot/ Më duket se i kam prekur/ Para disa shekujve/ kur vdisnin meteorët”.

Zëri i mullinjve të ujit dhe zëri i mullinjve të erës. Zëri i viktimave të luftës dhe zëri i ditës së nesërme. Dita e djeshme kur tundej edhe mali, kur si fije bari tundeshin rrapet, kur “Nga vegimet e një trishtimi/ Fluturoi një shpend gjigand”, kur deshën të qajnë nënat, kur nga një hënë e gjymtuar, si peri doli para lotëve, dhe u shndërrua në disa dallgë të papara. Përfytyrimi fanitet kur “Atë çast filloi të fryjë një furtunë/ Nëpër flokët e mjegullave/ Veç kishte rënë një borë e kuqe/ Mbase dimri/ Mund të prekej me dorë si hija”, kur më zë kotësia. Dhe papritmas, shqetsimin e zëvendëson optimizmi, kur filloj të mbjelli një farë të re, nga shpirti i erës, që i shtrydhi të gjitha trishtimet, dhe qeshi me gjelbërimin, deri sa pushojnë të reshurat: “Nuk kam më kohë për shitje/ As për të blerë s’kam lekë/



Tundem udhëve/ Si një varkë e humbur/ Dhe në shpirtin e pathyeshëm të detit/ U bie dauulleve të kushtimit”.

Në ciklin e dytë, Daullet e një nate, defilojnë tituj poemash tjera brilante, si: Sonte do të ecim, Te flokët e erës, Vijnë edhe sërish kthehen, Përtej çdo mundësie, Në tregtarë ëndrrash, Nëpër rrugët e qytetit të ngrirë, Si disa gjallesa parahistorike, Rri varur skeleti i erës, Ata që u flijuan për ty, Dhe hija e një druri etj. Jashtë mureve të lagështisë është cikli i tretë. Si zgalemat e rrufeve, Një dhembje si kjo, Në kokën time rebele, Pastaj vjen heshtja, As atje e as këtu, Më shkruaj një letër, Në bëhemi zogj të egër, janë disa nga poezitë e këtij autori që shëmbëllojnë me një album historik të lirikës sonë kontemporane. Sipas filozofit rumun, Tudor Vianu, feja, filozofia dhe arti janë pjesë e specialiteteve. Bota moderne del në pah me dridhjen e parë të mendimit. Adem Zaplluzha meriton respektin e lexuesit për idetë dhe mendimet e tij në fushë të kulturës.

***Baki Ymeri,  
Bukuresht, shtator 2013***



*Sonte nuk dua të vdes*

*Cikli i parë*



## **SI NJË VARR I VETMUAR**

Do provoj të luaj sonte  
Fatin e zogjve  
Ajo që ngjan me ajrin  
Duket si një ishull mes mjegullave  
Ishulli i uritur dhe i etur  
Si zogjtë e shkretëtirës

Rëra fluturon përtej mendimit  
Një kaktus i etur  
Pi ujë në shpirtin e rërës  
Dielli si një copë gace e përskuqur  
I pjek zogjtë në fluturim e sipër

Kjo dunë prej vezëve të breshkës  
Me gjasa paska mbetur  
Si një varr i vetmuar  
Një arkivol i hirtë  
Te një varr i panjohur  
I kreh flokët e thinjura të zhurit

## PËRTEJ KUJTESËS

Stina si syri i verbër  
I hënës  
Shikon tejpertej galaktikave  
Rritjen e një shelgu të pikëlluar

Përtej kujtesës  
Si nga një ëndërr e trishtë  
Prej vezëve të thyera  
Dalin çafkat  
Qielli i mbuluar me pupla njerëzish  
Hingëllon si kali i sëmurë

Përtej parmakëve të dritares  
Shoh djersitjen e ajrit  
Te dhoma e pritjes  
Një shpend krah madh  
Është ulur pranë kujtesës  
Dhe i ëndërron  
Ikjet e kota të stinëve

Ne ishim me gjasa të parët  
Që e gjetëm zjarrin  
Por mishin e pjekur e hëngri nata

2.

Kur dëgjuam kushtrimin  
Tupanët veç ishin shurdhuar  
Nëpër mëhallë  
Bredhin ardhacakët e dehur  
Dhe i recitojnë do psalme të vjetra  
Në një gjuhë të huaj  
Që s'na përket neve

Ne dënesëm një kohë të gjatë  
Me një ngashërim të padëgjuar  
Deri atëherë  
Dëneste edhe kori i bretkosave  
Por vaji i jonë  
Më duket edhe sot  
Që i përngjante lutjeve të erës

## **LËKURA**

Lëkura ime e grisur  
Shtatë herë u shit sot në treg  
Dhe herën e tetë  
U konvertua në hartën e atdheut



## **POR NE DO ECIM**

Sonte fjalët kanë filluar  
T'i përngjajnë kristaleve të borës  
Janë të ftohta si njerëzit  
Herë u përngjajnë eshtrave të elefantëve  
E herë arkivoleve të kalbura

Do dalim si gjarpri nga lëkura  
Do e grisim ëndrrën e posa të nisur  
Te ky gur që nuk i përngjan as murit  
Do i mbjellim krahët e zogjve

Nuk kemi kohë për fluturime të reja  
Me mija vjet fluturuam  
Dhe asnjëherë nuk e mbërrimë cakun  
Sonte do të mendojmë pak më ndryshe  
Për itinerarin e kësaj udhe

Do ecim tej përtej arsyes  
Nuk ka ndalje në këtë rrugë  
Poqë se ndalemi  
Kurrë më  
Nuk do të mund ta prekim  
Ëndrrën tonë të posa nisur

Sonte është koha  
Të cilën e kemi pritur me mija vjet  
Dhe do të nisemi  
Atje poshtë te ledhnajat e historisë  
Na presin  
Do punë posa të nisura

*Prishtinë, 30 korrik 2013*

## **NJË RE E DENDUR**

Më lëshoni  
Sonte dua të dal  
Nga klishtë e së kaluarës  
Do hy në labirintet e kësaj kohe  
Dhe si nëpër tregimet fantastike  
Të kaloj në anën tjetër të lumit

Në secilën degë të kësaj peme  
Do mbjellim nga një domethënie  
Më pastaj të ecim  
Deri te sinorët e luadheve  
Koha është  
Për kositjen e barit të njomë

Nëse vonohemi  
Për udhëtimin deri te baladat  
Nëpër rrugët e metropoleve do i kërkojmë  
Pendlat e ndukura të zogjve  
Që mbetën peng i një kohe tjetër

këtu sa ora ndryshojnë stinët  
Në lëkurën e Ballkanit të çmendur  
Herë shqepen  
E herë ngjiten hartat  
Një re e dendur  
Asnjëherë nuk i ndryshon itineraret

## NJË HËNË E GJYMTUAR

Këto gjëra që po i preki sot  
Më duket se i kam prekur  
Para disa shekujve  
Kur vdisnin meteorët

Mu te kjo hije e përhitur  
I kam prerë thonjtë  
Për t'i ushqyer zogjtë e erës  
Në nofullat e ujkut uria ishte e madhe

Më kujtohet kur frynte shakullina  
Tundej edhe mali  
Si fije bari tundeshin rrapet  
Nga vegimet e një trishtimi  
Fluturoi një shpend gjigand

Kur deshën të qajnë nënat  
Një hënë e gjymtuar  
Si peri doli para lotëve  
Dhe u shndërrua në disa dallgë të papara

Atë çast filloi të fryj një furtunë  
Nëpër flokët e mjegullave  
Veç kishte rënë një borë e kuqe  
Mbase dimri  
Mund të prekej me dorë si hija

## KUR MË ZË KOTËSIA

Kur më zë kotësia  
Filloj të mbjelli një farë të re  
Nga shpirti i erës  
I shtrydhi të gjitha trishtimet  
Dh qeshi me gjelbërimin  
Deri sa pushojnë të reshurat

Nuk kam më kohë për shitje  
As për të blerë s'kam lek  
Tundem udhëve  
Si një varkë e humbur  
Dhe në shpirtin e pathyeshëm të detit  
U bie daulleve të kushtrimit

Kur s'kam se çfarë të bëj  
Me duart e mia të tejdukshme  
Ia fali Lumëbardhit  
Tërë gjumin e erës me makthe  
Le të udhëtoj deri te ëndrra e Jonit  
Me ujin e kristaltë të shirave

Dhe kur më zë kotësia  
Ulem në grushtet e shkumës  
I skicoj të gjitha hartat e atdheut  
Pastaj si një eremit i moshuar  
Zë një vend nën blirin e lagjes  
Dhe bisedoj  
Me zogjtë e ikur të vendlindjes

## **PO VDES NJË MERIMANGË**

Kjo stinë e acartë  
Fshehurazi paska hyrë  
Në ishullin e dhembjes  
Dhe nuk ka të sosur kjo gjëmë

Po ikin zogjtë përtej kujtesës  
Ky dimër i vetmuar  
Po i përngjan flokëve të thinjura të erës  
Po i përngjan  
Trishtimit të jetës

Një njeri mbështetur te kukëzat  
Ua qan hallin zogjve  
Në këtë det të skamjes  
Fluturimet nuk paskan të ndalur

Një fanar i vetmuar  
I paska kyçur të gjitha dritat e ujit  
Në rrjetin e shkumës së bardhë  
Po vdes një merimangë

Hënëzat në një valle mortore  
Vajtojnë si nuset  
Diku në bregun e kundërt të jetës  
Dëgjohet vaji i trishtuar i një gërnete

## **NJË ULËRIMË PREJ BISHE**

Mos ,mos të lutem  
Mos më kundro  
Nga fushëveprimi i urrejtjes  
Kjo mollë e papjekur  
Është shkundur kaherë  
Nga degët e thyera të kujtesës

Një pamje surrealistë  
Paska lëshuar rrënjë  
Në kujtesën e arkivolit

Shirat nuk zbritën mbrëmë  
Si çdo herë  
Nga shpirtrat e mjegullave  
Fluturuan do zogj të verdhë

Më kujtohet  
Fare mirë më kujtohet  
Kur qante një çyçe mali  
Mbi një trëndafil të zi

I tërë lisi i shkundi gjethet  
Sa që u zhveshën degët  
Si në teatrin antik  
i dëgjuam piskamat e fëmijërisë



Dikur vonë  
Kur një hije e zezë  
I lëshoi perdet nëpër teatrot antike  
U dëgjuan mjaullimat e maceve të egra  
Mjaullinte skena prej dërrasave  
Një ulërimë prej bishe  
Ia prishi gjumin  
E qytetit të përhitur

## **NJË VARKË E MOÇME**

Si një hije e tejpashme  
Doli në syprinën e njelmët  
Një varkë e moçme  
Pas saj  
Dolën edhe hënëzat dhe kafshuan hënën

Ne ishim diku në fund të përrallës  
Ndoshta edhe nuk dihej  
Athua ishte fundi  
Ose fillimi i një tregimit të pasosur  
Por ishte diçka e paqartë  
Që i përngjante kashtës nga legjenda

Më thanë se nëse mbërri në fund  
Aty do t'i gjej  
Fillimet e këputura të mjegullave  
Në rrjetin e merimangës së zezë  
Fle një tregim i dyshimtë

Eca edhe disa vite të verbëta  
Asnjëherë nuk ngurova  
T'i preki plagët e Gjergjit  
Nga patërshana e trishtimit  
Pikonte dhembja e një shekulli

## LEHIN EDHE YJET

Isha vetë  
Pas meje vinte nata  
Dhe trokitjet e dyerve të hapura  
kurrsesi të ndaleshin

Një qen nuk i ndal të lehurat  
Lehin edhe yjet  
Dy zogj prej kashte  
E mëkojnë hënën e sëmurë

Isha fillikat me sterrën  
Ishte edhe një hije e thyer  
Vetëm errësira  
Kërkonte dritën mes gishtave të natës

Askush nuk këndonte  
Ama as nuk qante si era  
Vetëm meteorët endacak  
Mund të këndonin serenatë yjeve

## KJO NATË

Me gjasa mbrëmë ishte nata e zogjve  
Ne deshëm të këndojmë  
Por pas nesh si një kor çafkash  
Kënduan arkivolet

Një psalm posa kishte zënë vend  
Te një dunë prej eshtrave  
Në varrim përballë rrugës  
Dëneste një qemane

Pak fjalë shumë pak folën  
Zogjtë në ikje  
Mbase nata ishte e gjatë  
Nga majat e patërshanave  
Pikonte një gjak i gjelbër

Pak shumë pak patëm kohë  
T'i numërojmë plagët e hijeve  
Kjo natë  
Mos i përngjaftë asnjë nate  
Dhe mos ardhtë më asnjëherë  
Me kaq trishtim  
Në mesin tonë

## SI NJË HUKAMË DETI

Thua se jam njeri prej xhami  
Të gjithë shikojnë nëpërmjet meje  
Me sy të mbyllur  
Parakalon një tregim sapo i nisur

Edhe kjo stinë e mrrolur  
I ka shtri krahët mbi përparësen e shirave  
Jashtë kësaj dhome qorre  
Përmendësh këndohen psalmet

Një eremit me gjasa  
I paska humbur librat e shenjtë  
Nëpër faltoret e qytetit të Lumëbardhit  
Kanë filluar të vdesin kambanat

Si një hukamë deti  
Një gjëmë del nga shpirtngushtësia e tokës  
Vullkani i vdekur pështynë zjarr  
Si në ferr po digjen gurtë e atdheut

*Prishtinë, 31 korrik 2013*

## NË LOTIN E THYER TË MËNGJESIT

Pikojnë dhe s'dinë të ndalen  
Të reshurat  
Ky shi hibrid si ushejza  
Depërton në gjakun e njeriut  
Dhe mpikset në mallin e mërgimtarit

Diku si nëpër legjenda  
Po mbinë një përrallë e trishtuar  
Njerëzit kanë filluar t'i mbjellin flokët  
Në rrashtën e një guri  
Po çelin manaferrat do lule molle

Nuk patëm kohë të ndalemi të moli  
Anijet e ankoruara kishin ikur larg  
Një mbret në vend se të abdikoj  
E mbolli kurorën si lulen

Ne atë ditë nuk patëm se çfarë të bëjmë  
I shkulëm zambakët nga syri i gurit  
Dhe pimë ujë lajthie  
Në lotin e thyer të mëngjesit  
Sërish u ankoruan anijet e peshkatarëve

## **NËNA IME MOJ NËNË E MIRË**

Askund nuk i shihet fundi  
I kësaj nate  
Nëna ime askund  
Ti ishe ose s'ishe pranë nesh  
Kur ne përjetuam tronditjen e shpirtit

Ku i lëmë duart e trishtuara të shiut  
Atë natë nuk kishin të sosur dhembjet  
Një tren i çmendur  
Kalonte nëpër kalldrëmin e kujtesës

Ne mbetëm të shtangur  
Si një kallam i papjekur  
Përkundej era n'horizontin e përflakur  
Atdheu im ishte në udhëtim e sipër  
Mbi një tren shpirtrash  
Shkuleshin si bari gjymtyrët e një stine

Thonë se në Mars fillojnë të dalin gjethet  
Por këtu në fushat tona  
Kjo stinë vjen lakuriqe si e lindur nga nëna  
Vjen dhe na i sjellë telashet  
Që as gurtë e stralltë s'mund t'i durojnë

Nëna ime e bukura e dheut  
Më thuaj çfarë të bëjë  
Cilën këngë ta këndoj sonte  
Kur deri në pafundësi  
Po dhemb shpirti i gurit

Nëna ime moj nënë e mirë  
Sa krenare  
Po aq edhe e pikëlluar  
Më thuaj se çfarë të bëjë sonte



## MIKU IM

Miku im  
Cili do qofsh ti  
Kaloje urën e pikëllimit  
Nëse dëshiron  
Të takohesh me pemën  
Që rritet dhe shkulet në kujtesë

Kur të mbërrish në fund të udhës  
Pusho pak  
Nën hijen e degëve paganë  
Dhe pastaj sërish mos u ndalë  
Cili do qofsh ti  
Ec deri te uji kryengritës

Vetëm një gllënjë  
S'të duhet më shumë  
Për ta mësuar mjeshtërinë  
E poçarit të verbër

I cili nga një copë deltine  
Mundohet të krijoj një sy  
Të bëjë një tokë për të gjithë njerëzit  
Dhe një shpirt që merr frymë  
Te një kokë njeriu

## DY HERË NGA NJË E GJYSMË

Mbase sërish u kthjem nga Ferri  
Asgjë nuk ishte afër meje  
Në vetmi zgërdhihej  
Një kovë e vjetër  
E ndryshkur nga urinimi

Dy herë nga një e gjysmë  
Kishte errësirë në atë vetmi  
Mes lagështisë së paparë të mureve  
Si kërthi dëneste një gozhdë

Ngjante që ndonjëherë  
Të kem mysafir të paftuar  
Vinte shpesh në vizitë një zog  
Me një zarf të kaltër  
Dhe m'i sillte letrat e nënës

Pos germave me ngjyrë menekshe  
Nuk kisha se çfarë të preki  
Këtu në këtë dhomë të lagshtë  
Mund të preken vetëm ëndrrat

Zogu në dritare  
Dhe një kovë urinimi në dysHEME  
Sa shumë i përngjajnë  
Njëri tjetrit  
Sa shumë

Kur kësaj jete të një burgosuri  
I vjen era shurrë njeriu  
Shurrë trishtimi  
I këmishës së mykur të burgut

## **MË LËRË MË REHAT**

Mos më mashtro  
Ti tani je në brigjet e Adriatikut  
Kurse unë rri këtu i vetmuar  
Dhe si perënditë pagan  
I numërojë këputjet e meteorëve

Mos të lutem mos i shpalos  
Epshet e njelmësisë  
Në mua janë fundosur të gjitha anijet  
E mbretërve të pafat  
Mbrëmë abdikova për të tretën herë

Si mund të jesh kaq e ngurtë  
Ti po i përngjan cirqeve  
Këndon por nuk të dëgjohej kënga  
Me çfarë shkulumë malli  
Mund t'i shëroj këto dhembje që s'bëzajnë

Mos të lutem mos m'i ngacmo ëndrrat  
Nuk di se kujt do i përngjaja  
Nëse m'i merr vegimet  
Më lërë më rehat  
Unë kam shumë probleme  
Me vetveten time në këtë birucë

## KJO KOHË

Nuk është koha  
As t'i hapim e as t'i mbyllim  
Portat e ëndrrave  
Ky shi i kuq  
Çmendurisht po bie të manat e qytetit

Pa ëndrra nuk mund të jetohet  
Vetë ekzistenca  
I përngjan një vegimi të trishtë  
Dita ecën para nesh  
Deri te bigëzimet e lumenjve

Një fjalë e lindur para ose pas ëndrrës  
Ka po aq peshë  
Sa gjumi i bletës mbi një gjeth prej mali  
Një lule bore  
Paska çelur zogj të bardhë  
Në syrin e verdhë të ëndrrës

Nuk është koha të rrimë  
Me dritare të mbyllura  
Ëndrrat edhe ashtu nuk i njohin kufijtë  
Kjo kohë si me dritare të hapura  
Po ashtu edhe të mbyllura  
Është vetëm një ëndërr e keqe

## **NUK DI A ËSHTË DIMËR**

Nuk di a është dimër  
Ose verë  
Ky diell i ngrirë  
Pikon vrer

Sytë në qiell  
Te një hënë e kristaltë  
Yjet po ma grimcojnë lëkurën  
Si me një daltë

Një faqe e grisur  
Arnon mollëzën e akullt  
Kjo erë e krisur  
Te pemët e çmendura i shkund stinët

Nuk di a është dimër  
Ose një stinë meleze  
Por mendja e jonë  
Po ndryshon me shumë naze

## KY SHPIRTI IM PAGAN

Sonte nuk dua të vdes  
Le të ik ku të do  
Ky shpirt i im pagan  
Le të ikë  
Si shpirtrat e zogjve  
Ama unë s' dua ë vdes sonte

Dua të fluturoj  
Ashti siç fluturojnë zgalemat  
Sonte nuk ka vdekje  
Mes këtyre portokajve  
Dhe diellit alegorik

Më beso çfarë të them  
Që nesër në mëngjes unë do kthehem  
Me zërin  
Dhe hukamën e shpirtit të frymës

Po të them  
Se nuk ka vdekje sonte  
Prej një shpirti pagan do të dal  
Dhe do të fundosem  
Në shpirtra zogjsh

Sonte dhe asnjëherë  
Nuk do vdesin njerëzit  
Ndryshimi i kësaj forme të ngurtë  
I tejkalon  
Të gjitha parashikimet e profetëve



*Daullet e një nate*

*Cikli i dytë*



## SONTE DO TË ECIM

Këto vija konike  
Po i përngjajnë emrit tim  
Që nuk lakohet në rrasa  
Dhe qeshin me shiun  
Deri sa ngufaten ullukët me trishtim

Sonte do të ecim  
Deri te fundi i baladës  
Kur takohemi me bigëzimet e shikimeve  
Do i përngjajmë bregut të lumit

Një grusht algash të verdha  
Po i këndojnë psalmet e së dielës  
Një shi rrebesh është nisur nga majat  
Dhe nuk paska të ndalur

Do ulemi në këtë çast  
Te shelgjishtet e djegura  
Dhe do i pjekim mollët e shkundura  
Për festën e madhe të Pashkëve

## **TE FLOKËT E ERËS**

Kur kam uri  
Trokas në portat e gjetheve  
Një zog i vetmuar  
Hynë mes baladave  
dhe i këndon psalmet e Solomonit

Te flokët e erës  
Bie një shi i verdhë  
Kudo verdhësi në çarçafin e reve  
Vetëm kalorësit e vetëtimave  
Ngarendin pa pra  
Si mjegullat në shalat e shiut

Si hije mali ecim rrugëve  
Kalldrëmet me xhelozitë të padëgjues  
I prekin çatitë  
Nëpër parmakët e dritareve presin zogjtë  
Ardhjen e një stine me shi  
Ardhjen e zogjve pa pendla

## THONË SE

Sonte është e hënë  
Te muranat  
Kungohen gurtë e murrme  
Duhet të ecim dhe t'i zgjasim duart  
Përtej shpirtit të arkivoleve

Kjo poemë alegorike  
Me qindra vjet drite eci  
Duke i ndezur qirinjtë e pemëve  
Te kopshtet e fshatit një mollë  
Çdoherë i shkund frytet në këtë stinë

Ka kohë që frymëmarrja ime  
Nuk kishte se çfarë tu bëjë qirinjve  
Ajo vetë ndizej në vetvete  
Thonë se  
Përherë i përngjante pëllumbave vetëvrasës

Një hënë e zhveshur  
Parakalonte nëpër kolonadat e yjeve  
Asnjë meteor mbrëmë  
Nuk i shkundi trishtimet nga xhepat e erës  
Një yll i këputur nga sfondi i hapësirës  
Qante te varret fatet e shirave

## **VIJNË DHE SËRISH KHEHEN**

Sa herë që i hapim sytë  
Ndryshojnë imazhet e ngjyrave  
E verdha  
Nuk është më e verdhë  
Por ka një tjetër ngjyrë  
Që nuk i përngjan asgjëje

Ky udhëtim nëpër vetveten time  
S'ka asnjë rrugëdalje  
Te çezma e xhamisë  
Nuk xhindosen më plakat  
Vetëm bucelat e drunjta  
I shuajnë etjet  
Në trungun e tharë të një peme

Sa herë që i hapim portat  
Na vijnë mysafirët e paftuar  
Trokasin dhe nuk ndalen erërat  
Vijnë dhe sërish kthehen  
Me trokëllimat e kuajve  
Njerëzit endacak  
Dhe ca hije të netëve sterrë

*Prishtinë, 01 gusht 2013*

## PËRTEJ ÇDO MUNDËSIE

Këto fytyra  
Të skalitura në mermer  
Nuk paskan emër e as mbiemër  
Heshtin si guri i zi  
Edhe në rast se qajnë  
Vaji i tyre u përngjan mjegullave

Poqë se i takojmë sërish te fjalët  
Ky takim  
Mbase ka një domethënie tjetër  
Në fytyrat e ngrira të gurëve  
Çelin ca lule të kristalta  
Me një aromë të akullt prej mermeri

Kur ecin mes kolonadave  
Kanë një lëvizje madhështore  
Kokëlargët si mbretër  
Që asnjëherë nuk abdikuan  
Në sytë e tyre të ftohta çelë luledielli  
Ashtu siç mugullon lulja e kripës

Këta njerëz prej guri  
Me një shikim të mrrolshëm  
Kanë një pamje të tejpushme  
I shohin gjërat përtej çdo thellësie  
Përtej çdo mundësie

## DIKUR VONË KAH MBRËMJA

Këtu kur nga shtambat  
Derdhet nata  
Zogjtë e mendjes zbresin  
Dhe pinë ujë në shpirtrat e degëve

Një fyell dëgjohej diku larg  
Jashtë portave të mjegullta të erës  
Nëpër rrugën e qumështit  
Vijnë kalorësit e yjeve

Kur çelë agullima  
Si zambakët në qytetin tim  
Çelin edhe gjokset e vashave  
Portat e mbyllura në mendjen e lumit  
Për herë të parë hapen si fjalët

Dikur vonë kah mbrëmja  
Kur kthehen edhe udhëtarët e fundit  
Te Ura e Gurit disa zogj uji këndojnë  
Dhe deri në nadje nuk ndalen serenatat



## KY ËSHTË NJERIU

Ne të gjithë e dimë  
Se kjo garë nuk ka fitues  
Por sërish vrapojmë  
Dhe asnjëherë nuk ndalemi  
Për ta mbërri humbjen tonë

Një ditë takohemi me vetveten  
Të lodhur dhe të sflitur  
Ecim me kokëfortësi  
Deri te burimi  
Por prapë se prapë  
Jemi me humbjet e përditshme

Kjo ngjizje e humbjes dhe fitimit  
Mbase jeton me njeriun  
Kur papandehur takohemi  
Me asgjësimin e fjalëve  
Nuk di athua i përngjajmë vetvetes  
Apo garës së filluar që në gjenezë

Ne të gjithë nganjëherë dhe çdo ditë  
Vrapojmë si kuajt e egër  
Nuk ndalemi as kur na i vënë mëgojëzat  
Kjo është natyra e njeriut  
Ky është njeriu

## NGJYRAT

Nuk di a kanë gjërat ngjyra  
Ose sytë tanë të mekur  
Janë të ngjyrosur  
Me ngjyrat e tejdukshme të fjalëve

Kjo mosdije e errët  
Ose mosnjohje e sendeve  
Po e vë në pikëpyetje  
Metamorfozën e tejdukshme të ajrit

Sot jam i verdhë  
Kurse ditën tjetër i zi si sterra  
Cilat janë këto hije  
Që e kapërdinë emrin tim

Një kalë i mrrolur  
Mbase paska një ngjyrë të përhirtë  
Ose vetë ngjyrat  
Ndryshojnë formën e ekzistencës

Ngjyrat ah këto pamje të turbullta  
Sa shumë po i përngjajnë njerëzve  
Orë e çast ndryshojnë  
Në pasqyrat konkave të shpirtit

## NË TREGTARË ËNDRRASH

Të gjitha këto gjëra  
Që po ndodhin dhe ndryshojnë  
Në mesin tonë  
Nuk mund të krahasohen  
Me asgjë  
E as me fluturimet e zogjve

Ne herë u përngjajmë mjegullave  
E herë ëndrrave  
Nëse ndodh që të zgjohemi vonë  
E fajësojmë çarçafin e djersitur  
Dhe kurrsesi vetveten

Ngjan që të shndërrohemi  
Në tregtarë ëndrrash  
Dhe që në fillim të gjumit  
Në dhomën e fjetjes  
I humbim zogjtë e mendjes

Gjërat që preken  
Dhe ato që s'preken asnjëherë me gisht  
Nuk di a janë pjesët e gjumit  
Ose ato pjesë të ikura të ëndrrave  
Që s'takohen  
Asnjëherë me zhgjëndrrën e njeriut

## JA KY ËSHTË QYTETI IM

Është e hënë  
Një ditë e përmbushur me dashuri  
Eci rrugëve të fëmijërisë  
Dhe ndjem  
Ashtu siç ndjehet një perëndi

Me gishta të fishkura  
Lehtë shumë lehtë  
E ngacmoj të kaluarën  
Nën Urën e Gurit i preki flluskat e ujit  
Eci si një sovran kryelartë  
Që kurrë nuk abdikojë

Si bandillin më njohin kalldrëmet  
As qepenat  
Nuk lënë pa më përshëndet  
Kalaja disi më përcjellë me zili  
Kah kaloj çarshisë përpjetë

Ja ky është qyteti im  
I cili i njeh  
Të gjitha udhët e fëmijërisë  
Sa herë që gjezdisi përreth shatërvanit  
Xhamat e dritareve  
Akoma pëlcastin prej xhelozisë

## SECILI PREJ NESH

Këto mure të akullta  
Nuk kanë lidhje me prejardhjen time  
As ky ishull i vdekur  
Nuk ka asgjë të përbashkët me mua

Ne jemi larg njëri tjetrit  
Sa që nuk mund të krahasohemi  
Me asgjë që na rrethon

Secili prej nesh  
I ka ëndrrat e veta  
Të mbyllura  
Ose të hapura në kujtesë

Bredhim rrugëve larg nga njerëzit  
Na pengojnë nëse dashurojnë  
Por edhe nëse urrejnë  
S'munden me qenë me ne  
Sepse nuk i përngjajmë askujt

Ndonjëherë jemi të zbrazët  
U përngjajmë balonave fluturues  
Kurse në disa raste  
Mbushemi me urrejtje  
Sa që shpërthejmë si flluskë sapuni

Secili prej nesh  
I ka  
Dhe më së miri i njeh ëndrrat e veta  
I njeh rrugët kah ecën

Poqë se mbërrimë me i ndez qirinjtë  
E mendjes  
Do ecim deri te fundi i rrugës  
E cila asnjëherë nuk përfundon

## KJO LOJË POSA E FILLUAR

Nuk di  
Por sonte jam mbyllur si guaca  
Edhe ëndrrat i kam të mbyllura  
Këto shikime të gurëzuara  
Po i përngjajnë një ishulli  
Braktisur nga njerëzit

Nuk i ndjej as duart e mia  
Çfarë po ndodh  
Me përrallën time të fëmijërisë  
Bretkosa shndërrohet në mbretëreshë  
Kurse mbretëresha në bretkosë

Kah janë duke fryrë këto erëra  
Në mendjen time të zbrazur  
Qenkan grisur dimrat e një stine  
Ditët po i përngjajnë  
Kristaleve të borës në saksi

Nuk di më mbase kam mbetur pa emër  
Kur më thërrasin shirat  
Më ngrihen gjymtyrët e trupit  
Kjo lojë posa e filluar  
Ndoshta asnjëherë nuk do të përfundoj

## **MBASE QANTE DRURI**

Këto fytyra të lisave  
Disi po i përngjajnë skulpturave  
Prej mermeri  
Sa i ftohtë ky gur në këtë mur  
Sa të akullta duart e erës

Një lis i heshtur si një njeri  
Vetmon me dimrin e kaluar  
Në ashpërsinë e shpirtit të drurit  
Zgjohet një tregim  
I harruar nga njeriu i mirë

Frynte një erë e fortë  
Nëpër të çarat e lisave si ulërimë  
Dëgjoheshin disa zëra asnjëherë  
Mbase qante druri  
Ose ishte vaji i një guri të murrme

Kaluan edhe disa ditë të brishta  
Ne asnjëherë më nuk u këndellëm  
Sërish po dëgjohen zërat e gurëve  
Nga një furtunë e fortë  
Po shkulen pjergullat e papjekura

*Prishtinë, 03 gusht 2013*



## **E VETMJA MOTËR E VËLLAIT**

Pa asnjë njeri në rrugë  
Depërtoj nëpër plasat e errësirës  
Një heshtje e shurdhtë  
Zvarritet kalldrëmeve  
Eci në heshtje  
Duke përjetuar fatin e gozhdëve

Duhma e kësaj lagështie  
Po mi merr mendtë  
Dhe si një zvarranik hynë pa trokitur  
Nëpër portat e mbyllura të shpirtit  
Atje te shelgjishtet e pikëlluara  
Rënkon dhembja në shtratin e Gjergjit

E vetmja motër vëllait  
I lanë fashat e trishtimeve të erës  
Nëpër skutat e ngushta të mureve  
Fshihen zërat e një kohe  
Fshihen dhe askund nuk duken  
Hukamat e plagëve të njerëzve pa emër

## **NËPËR RRUGËT E QYTETIT TË NGRIRË**

S'di se si të depërtoj  
Nëpër këto errësira të ngushta  
Po më zihet fryma si këtyre degëve  
Që vuajnë nga astma

Kjo duhmë e rënd  
Mbase qenka e trëndafilave të kalbur  
Po ma zë frymëmarrjen  
Këlthas e bërtas  
Si një zog i zënë në kurth

Trokas te portat e mëdha  
Nuk hapen  
As nga përbrenda  
E as nga jashtë  
Dëgjohet zëri asnjanes e një klithme  
Heshtja e kalbur  
Po i pllakos mendimet

Paskam mbetur si një gur i vetmuar  
Asnjë zë sonte  
Nuk depërton deri te lumi  
Nëpër rrugët e qytetit të ngrirë  
Bredhin qentë  
Dhe endacakët e harruar prej njerëzve

## SI DISA GJALLESA PARAHISTORIKE

Tjetërkush sonte jeton në mua  
Me një pendël zogu  
I shëroj plagët e megjullave  
Dhe pa zë në heshtje mortore  
Kaloj rrugëve të fëmijërisë

Kaloj si të gjithë kalimtarët  
Askush  
Askënd nuk e njeh  
Qepenat më duken  
Si disa gjallesa parahistorike

Trokas në mendjen time  
Kurrsesi të hapen dyert  
Ku paskan mbetur miqtë e mi  
E harruan njëri tjetrin  
Ose ikën diku para kohe

Një pikëpyetje e madhe  
Si një sfinë  
Më është ngulur në rrashtën time  
Kurse duart e mia skelet  
Po u përngjajnë  
Gjymtyrëve të të vdekurve

## **RRI VARUR SKELETI I ERËS**

Ndodh që të ulem përballë pasqyrës  
Dhe shikoj ekzistencën time  
Në fund të filxhanit  
Ai njeri atje në thellësi  
Të një tejdukshmërie të paparë  
Pa kurrfarë hezitimi  
I zgërdhiet çdo kalimtari

Ky shikim i pandërprerë  
Po i nervozon mushkonjat  
Pas shpinës sime  
Njeriu që i përngjan një eremiti  
Po i prenë flokët  
Dhe mustaqet e thinjura

Përbrenda kornizës së kalbur  
Diçka nuk po funksionon  
Sërish një njeri i huaj  
Më bënë me dorë  
Nuk di  
Më thërret mua ose të kaluarën  
Por dorën kurrsesi nuk e ndal

Sërish sot një njeri i panjohur  
Trokiti në amalgamën e kujtesës  
Jashtë mureve të lagështa  
Rri varur skeleti i erës  
Dhe një njeri sykaltër  
Si qielli  
Kundron me shumë vëmendje  
Durimin mbinjerëzor

## KJO UDHË E GJATË

Kur më nuk kemi se ku të shkelim  
Do të ecim si somnambul  
Mbi shkallët e verbëta  
Të ecjeve tona të pafundme

Kjo udhë e gjatë  
Që shtrihet përtej së kaluarës  
E cila kurrë nuk përfundon  
Një ditë do të zhytet  
Si rosat e egra në shpirtin e mjegullave

Na domosdo nuk guxojmë të ndalemi  
Duhet të ecim  
Fundi i rrugës as që ekziston ndokund  
Çdo hap i kaluar  
Është një fitore mes gjetheve

Domosdo duhet të ecim  
Nëse ngjan e kundërta  
Nuk do të kemi më kohë ta arrijmë  
Njëherë e përgjithëson pafundësinë  
E prekjes së yjeve endacak

E kur të mbërrimë  
Poqë se mbërrimë ndonjëherë  
Deri te përrallat tona  
Do i pyesim shkurtabiqët  
Për një fund që nuk ekziston

## DAULLET ATË NATË

Çdo gjë ecën  
Mandej edhe milingonat  
Nuk kanë të ndalur në rrugën e qumështit  
Ecin siç pështillet ajri i tymosur  
Nëpër trarët e djegur të psalmeve

Dje mu kujtua se ishim te plepat  
Kur filluan të vuajnë gjethet nga skleroza  
Shiu i tepërt i zverdhi rrënjët  
Dhe kurrë më nuk çelën lulet  
Në syrin e trungut

Dolën edhe fëmijët e fshatit  
Me i pritur dasmorët  
Një grusht gur në sinorin e atdheut  
S'kishim se ku të lëshojmë  
Kudo kundërmonin kandrat e zeza

Akoma vazhdojnë të reshurat  
Bien dhe nuk ndalen meteorët  
Dasmorët dolën te varret e bardha  
Daullet atë natë  
Nuk pushuan deri vonë  
Kur ia behu agullima  
Fëmijët e përqafulen nusen



## ATA QË U FLIJUAN PËR TY

Ata që u varrosen pa kryq  
Pa hoxhë pa prift  
Dhe gjysmëhënë  
Janë djemtë më të denjë të kombit

Ata nuk deshën asgjë tjetër  
Të marrin me vete  
Mjaftonte vetëm hija e një shkoze  
Dhe nderi i atdheut

Ata që hynë me dinjitet  
Në shpirtra të mermerëve  
Kurrë më  
Dhe asnjëherë  
Nuk e pranuan vdekjen

Ata që u flijuan për ty  
O atdhe  
Në ajrin tënd të kristaltë  
U kemi ngritur  
Përmendore amshimi

## **DHE HIJA E NJË DRURI**

Sonte më duhet vetëm një ëndërr  
T'i këpus nga ky pjergull  
Blasfemitë e fëmijërisë  
Ka ditë që kam ecur si i verbëti  
Nëpër stërnishtat e kujtimeve

Veçse një ëndërr e lashtë  
Më ka mbetur peng  
Dhe hija e një druri  
Që asnjëherë nuk lulëzoi  
Kur më duheshin duart e tua

Sonte më duhet vetëm një tregim  
Dhe ëndrra e një nate  
Të cilën  
Kurrë nuk e harrova

Po deshe ti shkundi mollët  
Në kopshtin e mëkateve  
Unë më nuk kam forcë  
Për të iu kthyer ëndrrës së një nate  
Që kurrë nuk e harrova

## JE NJË PERI

Ti je burimi  
Dhe shpresa e të përmbyturve  
I drejtoj lutjet kah ti  
Kur je duke ikur  
I pyes zogjtë në fluturim  
Askush nuk e di prejardhjen e mollës

Je grua apo nënë  
Që me duart e tua të brishta  
Përkund zërin e heshtur të zjarrit  
I përkund  
Djepat në ninullat e yjeve  
Dhe asnjëherë nuk të bezdisin  
Ikjet e meteorëve me bisht

Je lumi që gurgullon  
Baladave të jetës  
Ti je shtrati dhe bregu  
I cili asnjëherë  
Nuk takohen me trishtimin  
Udhëtimet e tua janë të gjata  
Dhe nuk kanë të sosur si lindjet

2.

Ti je grua  
Je atdheu që kafshon  
Je varri dhe djepi  
Sa herë që hijet ndryshojnë  
Në shpirtin tënd  
Zgjerohen paralelet e mendimeve

Je burimi i lindjeve  
Je një peri  
Dhe do mbetesh e tillë  
Deri në përsosmëri

## DO TË VIJ DERI TE TI

Do të vij deri te ti  
Në çastin kur të prekin duart e mia  
S'do të jem unë  
Por hija e një druri prej mishi

Ti nuk ke se për çfarë të frikësohesh  
Nga zbrazëtira e kafkës sime  
Sepse çdo gjë e zbrazët rrethon  
Këtë vazo sferike  
Të zbrazëta janë edhe shikimet e mia

Të thash se unë do të vij një ditë  
Por nëse nuk kthehem  
Me shijen e bukës  
Dhe të mjegullave  
Ti mos u merakos aq shumë

Këtu te ne  
Dimrat janë të paparashikueshëm  
Jemi mësuar të ziejmë  
Lëvore drurësh kur na zihej fryma

Do të vij deri te ti  
Nëse humbi mes këtyre rreshtave  
Dhe nuk mund të më gjesh  
Askund  
E as nën hijen e rrapit

Ti më kërko në pluhurin e sinorëve  
Ose nëpërmjet shpirtrave  
Më kërko ku të duash  
Por mos më kërko vetëm në Ferr

*Prishtinë, 03 gusht 2013*

*Jashtë mureve të lagështisë*

*Cikli i tretë*





## ATË DITË NJË ARKIVOL I MBYLLUR

Sonte më duket gjithçka e largët  
Të paprekshëm janë yjet  
Në sfondin e kujtimeve  
Vetëm një hije e bardh  
Përkundet si lisi i tharë

Në këtë kohë  
Gjethet nuk bëzajnë mes gishtave  
Kaloj edhe treni i fundit  
Pranë stërnishtave të kositura  
Iku edhe vjeshta

Si duart e huaja  
Mbetën duart e mia  
Të fshehura diku në xhepat e erës  
Nuk di vallë  
A po i përngjaj drurit në kopsht  
Ose portave të mbyllura

Kjo heshtje që më mbështjell  
Me çarçafin e trishtimit  
Paska ardhur këtu si arkivoli

Diçka e paqartë me pret  
Në fund të rrugës  
Si hutini zogun e plagosur

2.

Më kujtohet fare mirë e di  
Kur si një pendël zogu  
U lëshua në tokë gjethi i fundit  
Stina rrinte e mrrolur  
Dhe dëneste si kukuvajka

Nëpër të çarat e erës tmerrshëm  
Fërshëllente furtuna  
Fërshëllente  
Një shpirt i nakatosur

Atë ditë një arkivol i mbyllur  
Dhe i gozhduar  
Me sfina prej dhembjeve  
Bartej nga duart e plagosura të erës

## SI ZGALEMAT E RRUF EVE

Vjeshta e paska veshur  
Pallton e shqyer të dimrit  
Mbase përgatitet për të ikur  
Gjethet më në qytetin tim  
Nuk u përngjajnë gjetheve  
Qenkan zverdhur kokrrat e klorofilit

Nga frytet e pjekura  
Rënduar janë pemët  
Degët thyhen  
Mollët dhe kumbullat  
Puthen me tokën gratçore  
Kurse nuset i kanë hapur krahët  
Urishëm i përpinë  
Edhe farat e fundit të kësaj stine

Një tjetër stinë e bardhë  
Por me një vrazhdësi  
Të paparë  
Kundron si orli

Nga grykat e thepisura të Sharrit  
Degët e lisave  
Kanë filluar të thyhen nga acari  
Acar edhe në shpirtra  
Që ndjejnë ardhjen e marsit

Dhe shumë shpejt  
Me një shpejtësi të padukshme  
Si zgalemat e rrufëve  
Erdhi edhe një Mars i çmendur

Atë çast Prishtina përjetoi  
Kërcëllimat e rrotave të trenit  
Menjëherë pas mesnate  
Mbetën diku në jug  
Edhe binarët e fundit të shpresave

## **NJË DHEMBJE SI KJO**

Ka kohë që kam mbetur i verbët  
Nga këto drita fosforeshente  
Një hënë e kuqe te mjegullat  
Shtrydh lotin e gurit

kam parë edhe herëve të tjera  
Se si kallej toka ime  
Kam shkelur zbathur si gjyshi im  
Nëpër prushet e atdheut

Një dhembje si kjo  
Nuk mund ta duroj guri  
Pak shi  
O vetëm pak shi  
Duhet ta shuaj zjarminë e këtyre etheve

Një dhembje si kjo  
Nuk mund të durohet më  
Ma prekni fytyrën e ngrirë  
Nga ky prush që digjet në shpirt  
Po shkrihen thonjtë e duarve të mia skelet

## DILEMA

Nuk di cili prej nesh  
Jeton brenda njëri tjetrit  
Zgjati duart e tua të mjegullta  
Përqafoje hënën  
E portokalltë te ullishtat

Një tjetër diell  
Po lind mbi kokën time të thinjur  
A jam unë ti ose ti je unë  
Këtë mund ta mësojmë  
Nga pluhuri i kuq i arkivolit

Sa herë që ecëm me sy të mbyllur  
Në drejtim të njëri tjetrit  
Para nesh shfaqeshin si fantazma  
Krakëllimat e sëmura  
Të një dite që i përngjante  
Korbave endacak

Preke fytyrën tënde  
Në lotin e pasqyrës konvekse  
Edhe ti do qash si asnjëherë më parë  
Sepse zogjtë e ikur të mendjes  
Sonte nuk ankorohen  
Në asnjë lima

## MËKATAT

I ndalëm orët e murit  
Vetëm ato të diellit sonte punojnë  
Nën kajsishte paska mbetur  
Shumë pak megjull  
Ikën lypsarët  
Me kalorësit e parë të mëngjesit

Ne pritëm një kohë të gjatë  
Ishin të kota  
Dyndjet e zogjve shtegtar  
Vetëm hingëllimat e kuajve  
Tregonin të tjerëve  
Se nëpër këto shtëpi përdhese  
Ende banojnë njerëzit

Lagjet i kishin harruar  
Të gjitha predikimet dhe lutjet  
Po ashtu edhe psalmet  
Ishin diçka të huaj  
Askush nuk i pranon si të vetat  
Bredhin si zogjtë endacak  
Nëpër shpirtra njerëzish

## **NË KOKËN TIME REBELE**

Mos të hyjë më asnjë ëndërr  
Në thellësinë  
E syve të mi të gështenjtë  
Ti ishe ëndrra ime e parë  
Dhe e fundit  
Gjer sa i kalëroja mjegullat

Prej grykave të Sharrit  
Me shekuj i dëgjonim  
Këngët e shtojzovalleve

Pastaj nën flokët e tua  
Të mëndafshta i shtruam  
Të gjitha yjet e universit

Ti sërish mbete në kujtesë  
Një yll i papërsëritshëm  
Në kokën time rebele  
Andaj nuk kam nevojë më  
Për asnjë yll  
Që ta krahasoj me ëndrrën time



## PASTAJ VJEN HESHTJA

Netët nëpër shtëpia të vogla  
Siç është kjo e imja  
Janë shumë të ngushta  
Të ngufasin si makthi i zi  
Sa herë që marr frymë  
Me shumë probleme  
Hapen dritaret

Këto shtëpiza të vogla  
Përpos zemrës  
Kanë diçka tjetër të madhe  
Ndoshta frikën  
Ose vetë ekzistencën e dyshimit  
Kur ajrosen lagështit e mureve  
Nëpër dhoma futen disa lloje mizash

Pastaj vjen heshtja  
Me gjasa është vëllai i makthit  
Të zë për jake dhe nuk të lëshon  
Me muaj të tëra  
Ti mundohesh të ikësh  
Por nuk të lëvizin  
Këmbët e tua prej plumbi  
Ngjizen për dyshemenë e akullt  
Dhe shndërrohen  
Në merimanga prej tmerri

## AS ATJE E AS KËTU

As atje e as këtu  
Por kudo shtrihen duart e lypsarëve  
Shikimet e zbrazëta  
Me përplot dhembje  
Depërtojnë nëpër sytë e verbët  
Të njerëzve

Kalojnë trotuareve mondanët  
Duke u zgërdhirë me dashnoret  
S'shohin asgjë  
As duart e shtrira  
Që verbojnë sytë e ajrit melankolik  
Ecin pa kurrfarë qëllimi  
Përballë një fantazme

Ecin thua se janë njerëz të mirë  
Nëpër xhepat e mbushura  
Me verdhushka  
Tringëllojnë zërat e një egoizmi  
Dhe nga të qeshurat  
Harrojnë ekzistencën njerëzore

As atje e as këtu  
Dhe asgjëkund  
Nuk ndizen dritat e shpresave  
Për skamnorët  
Refreni Zoti të ndihmoftë  
I përngjan përsëritjeve të njëtrajtshme  
Të papagajve të verbët

## MË SHKRUAJ NJË LETËR

Në çfarë do qoftë kohe  
Ti më shkruaj  
Një letër që frymon  
E bardha  
Nuk është përherë e bardhë  
As e kaltra e kaltër

Ngjyrat ndryshojnë si njerëzit  
Dhe sipas mendimeve  
Sepse as guri nuk i përngjan gurit  
Kur ndjen dhembje  
Dhe kur qanë në duart e skulptorit

Të lutem  
Më shkruaj thjeshtë një letër  
Pa emocione  
Ashtu siç njeriu  
I shkruan mikut të vetë

Më kanë lodhur për së tepërmi  
Këto letra elektronike  
Që nuk kanë kurrfarë arome  
Pa ngjyrë dhe shije  
Shih sa është lodhur tastiera  
Më shkruaj me dorë dhe shpirt  
*Prishtinë, 04 gusht 2013*

## **POR AI BURRË**

Më kujtohet fare mirë më kujtohet  
Kur ti i ngjaje fluturës  
Së larme nëpër fusha  
Kaloje nëpër skenat e kuqe  
Çdo gjë më dukej kuq  
Si fustani yt i tejdukshëm

Në kraharor si burime ujërash  
Gufonte shpirti i bareshës  
Kurse zemra prej bilbili  
Të rrihte si një daulle

Qeshjen e kishe fshehur si çdoherë  
Te puthjet e këngës  
Nën dërrasat e podiumit  
Brohoriste masa  
Prej miliona njerëzish

Rexhoja i madh  
Me xhelozi e fshihte krenarinë  
Nuk di askush  
Athua vallë  
Të dashuroj ty më shumë  
Se këngën “Oj bareshë”

Por ai burrë  
kishte një zemër të madhe  
Për gruan e podiumeve  
Dhe këngën që fluturonte  
Nëpër shpirtin e plagosur të popullit

## JASHTË MUREVE TË LAGËSHTISË

Një dru po ecën zbathur  
Drejtë kujtimeve të gjetheve  
Po ecën edhe një njeri i huaj  
Ecën edhe vjeshta  
Me një arkivol të verdhë  
Askund asnjë degë e pathyer

Një trishtil me një pamje asnjëse  
Rri mbi një dunë prej trishtimi  
Ri dhe i ledhaton  
Me krahët e saja të thyera  
Ajrin e tymosur të hanit  
Që i përngjan  
Pendlave të qullura të heshtjes

Kalon procesioni i vargjeve  
Parakalojnë  
Edhe disa lloje arkivolesh  
Një zë si trishtimi i zogut  
Dëgjohet përtej një varri të vetmuar  
Jashtë mureve të lagështisë  
Po ngufatet si një njeri  
Vetmia e trishtuar e një zogu

## NE BËHEMI ZOGJ TË EGËR

Kur nuk patëm se çfarë të bëjmë  
Ecëm në dy kohë  
Si në dy paralele të binarëve  
I përjetuam makthet e ëndrrave

Një ditë bie një shi imcak  
Kure ditën tjetër na pjekë dielli  
Sa herë që na takohen shikimet  
Te lulëzimet e manaferrave  
Në bëhemi zogj të egër

Provojmë shijen e fluturimit  
Na duken të hidhura  
Thundrat e ditës  
Një stinë e egër i shkund mollët  
Kurse ajo tjetra  
Merret me meremetimin e gjetheve

Kur s'na zë vendi vend  
Bredhim si të huaj  
Dhe vrapojmë qorrazi  
Nëpër mendimet tona  
Kur duhet t'i hapim portat  
Shndërrohemi në heshtje  
Si vazot e mbyllura të një vjeshte



## FSHEHURAZI KAM HYRË

Me qindra herë  
Ndoshta edhe më shumë  
Desha të shkuli nga shpirti im  
Një epitaf për të nesërmen

Por asgjë prej kësaj pune  
Dikur vonë kuptova  
Se unë s'di të shkruaj poezi

Kalova pranë mijëra varreve  
Po aq herë me kokëfortësi  
I lexova mbishkrimet e lashtësive

Por kurrë nuk mësova  
Se si mund të shkruaj një poezi  
E të mos qaj era  
Fatin e zogut në fluturim

Fshehurazi kam hyrë  
Edhe nëpër varret krishtere  
Diku ndezja nga një cigare  
E diku e qoja nga një gotë  
Nëse jo për shpirtin e të vdekurit  
Atëherë e pija  
Për shëndetin dhe paaftësinë time  
*Prishtinë, 05 gusht 2013*



**Adem Zaplluzha** u lind në Prizren, më 1943. Shkollën fillore dhe të mesme i kreu në vendlindje, ndërsa Akademinë Pedagogjike në Prishtinë. Një kohë punoi si mësues nëpër fshatrat Studençan të Therandës (ish Suharekës) dhe Hoça e qytetit, afër Prizrenit. Ndërkohë punësohet si përkthyes në Korporatën Energjetike të Kosovës. Me shkrime filloi të merret kryesisht me poezi që nga mosha e fëmijërisë. Rugën letrare e nisi me vjershën e parë për fëmijë të cilën e botoi në revistën “Pionieri”, më 1957. Si i punësuar në Korporatën Energjetike të Kosovës bashkë me shokët e punës dhe pendës themeloi grupin letrar “Lulëkuqet e Kosovës”. Në Kuadër të punës së këtij grupi letrar qe botuar përmbledhja “Ngjyra e kohës”, në të cilën u përfshi një numër i konsideruar i poezive të tij. Krahas krijimeve të publikuara në revistat për fëmijë, botoi edhe një serë shkrimesh nëpër gazetatat e kohës që dilnin në Prishtinë dhe Shkup. Është anëtar i Lidhjes së shkrimtarëve të Kosovës, prezent në disa antologji dhe në librin Kosova letrare të poeteshës Monica Mureshan. Është prezantuar në *Leksikonin e Shkrimtarëve Shqiptarë 1501-1990*, nga Hasan Hasani, në *Leksikonin Shkrimtarët Shqiptarë për fëmijë 1872 - 1995* nga Odhise K. Grillo, si dhe në librin *Portrete Shkrimtarësh* nga Demir Behluli, Prishtinë, 2002. Në maj të vitit 2013 Klubi i Artistëve dhe i shkrimtarëve të Durrësit ia ndau çmimin e karrierës për kontributin e dhënë në letrat shqipe. Jeton dhe krijon në Prishtinë ndërsa aktivitetin letrar e zhvillon në kuadrin e Klubit letrar “Fahri Fazliu”, në Kastriot.

## **BOTIME TË AUTORIT**

1. **“Puthje”, poezi**, “Rilindja”, Prishtinë, 1974.
2. **“Ecjet e viteve të mëdha”, poezi**, “Jeta e Re”, Prishtinë 1995.
3. **“Çamarrokët e Thepores”, poezi për fëmijë**, “Shkëndija”, Prishtinë 1996.
4. **“Muret”, poezi**, “Jeta e Re”, Prishtinë, 1997.
5. **“Morfologjia e dhembjes”, poezi**, “Faik Konica”, Prishtinë, 2000
6. **“Ai vjen nesër”, poezi**, Qendra e Kulturës, Klubi letrar “Fahri Fazliu”, Kastriot, 2007
7. **“Letër nga mërgimi”, poezi**, Klubi letrar “Fahri Fazliu” Kastriot, 2007
8. **“Letër nga mërgimi 2 “** poezi, “Qendra e Kulturës”, Klubi letrar, “Fahri Fazliu”, Kastriot 2007
9. **“Udhëdarja”, poezi**, “Qendra e Kulturës”, Klubi letrar, “Fahri Fazliu”, Kastriot, 2008
10. **“Thirrje e gjakut”, poezi**, “Qendra e Kulturës”, Klubi letrar, “Fahri Fazliu” Kastriot 2008
11. **“Asgjë sikur molla”, poezi**, “Qendra e Kulturës”, Klubi letrar “Fahri Fazliu”, Kastriot, 2009.
12. **“Vesa në lotin tim”, poezi**, “Qendra e Kulturës”, Klubi letrar “Fahri Fazliu”, 2009,
13. **“Puthja e gozhduar”, poezi**, “Qendra e Kulturës”, Klubi letrar, “Fahri Fazliu”, Kastriot, 2009.
14. **“Kashelasha në vargje”, poezi për fëmijë**, “Qendra e kulturës, Kastriot, 2009.
15. **“Pema e bekuar”, E përkthyer**, Rumani, 2010.

16. “Bajraktarët e vatanit”, poezi satirike, Klubi letrar, ”Fahri Fazliu” Kastriot , 2010.
17. “**Hijet e ndryshkura**”, poezi,”Qendra e kulturës”, Kastriot,2010.
- 18.”**Stuhi në Kutulishte**”, poezi,”Qendra e kulturës”, Kastriot,2010.
19. “**Posa ikte nata**”, poezi, “Qendra e kulturës “, Kastriot,2010.
20. “**Loja e myshqeve**”, poezi,”Qendra e kulturës”, Kastriot,2010.
21. ”**Lumëbardhi dhe gjëma**”, poezi,”Qendra e kulturës”,Kastriot, 2010
22. “**Metafora e heshtjes**”, poezi, “Qendra e kulturës”,Kastriot, 2010
23. ”**Hyji në Prekaz**”, poezi,”Qendra e Kulturës”, Kastriot,2010.
24. ”**Sinorët e hinore**”, poezi, Shoqata e Shkrimtarëve-Kastriot 2010
25. ”**Don Kishoti dhe Rosinanti**”, poezi, Shoqata e Shkrimtarëve, Kastriot, 2010
- 26.”**Zjarri i dashurisë**”, poezi, Shoqata e Shkrimtarëve-Kastriot, 2010
27. ”**Kur likenet vallëzojnë**”, poezi, Shoqata e shkrimtarëve-Kastriot, 2010
28. “**Ditari në vargje**”, poezi, Shoqata e Shkrimtarëve-Kastriot, 2010
29. “**Tingujt që nuk përfundojnë**”, poezi, Shoqata e shkrimtarëve –Kastriot, 2010.
30. “**Shtegu i mallit**”, poezi, Shoqata e shkrimtarëve-Kastriot, 2010
31. ”**Korniza e thyer**”,Poezi, Shoqata e shkrimtarëve, -Kastriot, 2010

32. **“Zgjimi i gjëmës”**, Poezi, Shoqata e Shkrimtareve-Kastriot, 2010
33. **“Vallja mistike”**, Poezi, Shoqata e Shkrimtarëve- Kastriot, 2010
34. **“Merre kodin”**, Poezi për fëmijë, Shoqata e shkrimtarëve Kastriot, 2011
35. **“Letër atdheut”** poezi, Shoqata e Shkrimtarëve-Kastriot, 2011
36. **“Tejdukshmëria e shiut”**, Poezi, Shoqata e Shkrimtarëve- Kastriot, 2011
37. **“Përtej teje”**, poezi, Shoqata e Shkrimtarëve-Kastriot, 2011
38. **“Sa afër e sa larg”**, poezi, Shoqata e shkrimtarëve-Kastriot, 2011
39. **“Vallja e zanoreve”**, Poezi, Shoqata e Shkrimtarëve- Kastriot, 2011
40. **“Ikja e eshtrave”**, Poezi për të rritur, Shoqata e Shkrimtarëve- Kastriot, 2011
41. **“Kalorësit e mjegullave”**, Poezi, Shoqata e shkrimtarëve-Kastriot, 2012
42. **“Hingëllimat e shiut”**, Poezi, Shoqata e Shkrimtarëve- Kastriot 2012
43. **“Kur pemët i ndërrojnë këmbishët”**. Poezi, Shoqata e Shkrimtarëve- Kastriot, 2012
44. **“Mirëmëngjes Imzot”**, Poezi, Shoqata e shkrimtarëve – Kastriot, 2012
45. **“Kafshimi i mikut”**, Poezi satirike, Shoqata e Shkrimtarëve- Kastriot, 2012
46. **“Atje tej maleve”**, Poezi, Shoqata e shkrimtarëve, Kastriot-2012

47. **“Heshtja që del në shesh,”** Poezi, Shoqata e Shkrimtarëve, Kastriot -2012
48. **“Portat e shpresës,”** Poezi, Shoqata e shkrimtarëve, Kastriot-2012
49. **“Në dhomën time gjysmë të errët,”** Poezi, Shoqata e Shkrimtarëve- Kastriot, 2012
50. **“Kinse Lojë Shahu,”** Poezi, Shoqata e Shkrimtarëve- Kastriot, 2012
51. **“ Për çdo dekadë nga një baladë “,** Poezi, Shoqata e Shkrimtarëve – Kastriot, 2012
52. **“Fusha e mëllenjave,”** Poezi, Shoqata e shkrimtarëve- Kastriot, 2012
53. **“E kujt është kjo vetmi,”** Poezi, Shoqate e Shkrimtarëve- Kastriot, 2012
54. **“Mos pyet për adresën e lumit,”** Poezi, Shoqata e Shkrimtarëve – Kastriot, 2012
55. **“ Stoli në parkun vjetër”** Poezi, Shoqata e Shkrimtarëve- Kastriot, 2012
56. **“Urori i stralltë,”** poezi, Shoqata e shkrimtarëve –Kastriot, 2012
57. **“Po të mos ishte fjala,”** Poezi, Shoqata e shkrimtarëve- Kastriot,2012
58. **“Thyerja e urave,”** poezi, Shoqata e shkrimtarëve –Kastriot, 2012
59. **“ Trokëllimat në gjumin e dallgëve,”** Poezi, Shoqata e Shkrimtarëve- Kastriot, 2012
60. **“ Në flokët e dëborës,”** poezi, Shoqata e Shkrimtarëve –Kastriot, 2012
61. **“Një grusht nostalgji,”** Poezi, Shoqata e Shkrimtarëve-Kastriot, 2012
62. **“ Kur filluan të flasin njerëzit,”** poezi, Shoqata e shkrimtarëve- Kastriot, 2012

63. **“Kur stinët kapërcejnë fshehurazi”**, poezi, Shoqata e Shkrimtarëve – Kastriot, 2012
64. **“ Lisi në rrënjët e veta”**, Poezi, Shoqata e Shkrimtarëve –Kastriot 2012
65. **“Eca ecëm dhe do ecim”**, Poezi, Shoqata e Shkrimtarëve – Kastriot, 2012
66. **“Fëmijët e erës”**, Poezi, Shoqata e shkrimtarëve-Kastriot 2012
67. **“ Çast në fund të stinës”**, Poezi, Shoqata e Shkrimtarëve- Kastriot-2012
68. **“Si të flas me drurët”**, Poezi, Shoqata e Shkrimtarëve-Kastriot, 2012
- 69, **“ Më pëlqejnë mendimet e tua”**, Poezi, Shoqata e Shkrimtarëve- Kastriot , 2012
70. **”Andej dhe këndej kohës”**, poezi, Shoqata e Shkrimtarëve- Kastriot , 2012
71. **“Zëri i heshtjes”**, poezi, Shoqata e Shkrimtarëve- Kastriot, 2012
72. **“Kush i lexoi letrat prej erës”**, poezi, Shoqata e Shkrimtarëve-Kastriot, 2012
73. **“ Fluturimi i korbave në netët pa hënë”**, prozë poetike, Shoqata e Shkrimtarëve –Kastriot, 2012
74. **“Koha e ime dhe koha e jote”**, Poezi, Shoqata e Shkrimtarëve-Kastriot , 2012
- 75.” **Diku te një baladë”**, Poezi, Shoqate e Shkrimtarëve –Kastriot, 2012
76. **“ Sonte çdo gjë po i përngjan lotëve”**,Poezi, Shoqata e Shkrimtarëve –Kastriot, 2012
- 77 **“ Ky def prej hëne”**, Poezi, Shoqata e Shkrimtarëve-Kastriot, 2012
- 78.**“Pyesni zogjtë në ikje ”**,Poezi , Shtëpia botuese “Fahri Fazliu”- Kastriot 2013



- 79 “ **Fërfërimë gjethesh**”, Poezi, Shtëpia botuese “Fahri Fazliu”, Kastriot- 2013
80. “**Refrene yjesh**”, Poezi, Shtëpia botuese “Fahri Fazliu”- Kastriot, 2013
81. “**Te delta e mjellmave**”, Poezi, Shtëpia botuese “Fahri Fazliu”, Kastriot- 2013
- 82.“**Rinjohja**”, Poezi, Shoqata e Shkrimtarëve “Fahri Fazliu”- Kastriot, 2013
- 83.“**Diku në fund të një fillimi**”, Poezi, Shoqata e Shkrimtarëve, “Fahri Fazliu”- Kastriot, 2013
- 84.“**Makthi i hijes**”, Poezi, Shoqata e Shkrimtarëve-“ Fahri Fazliu”Kastriot, 2013
- 85.“**Një zog prej uji**”, Poezi, Shoqata e Shkrimtarëve “Fahri Fazliu”- Kastriot,2013
- 86.”**Asnjë fjalë nuk frymon**”, Poezi, Shoqata e Shkrimtarëve, “Fahri Fazliu”- Kastriot, 2014-
- 87.”**Daullet e një nate**”, Poezi, Shoqata e shkrimtarëve “Fahri Fazliu”-Kastriot 2014

## PËRMBAJTJA

<b>Ky shpirti im pagan - cikli i parë</b> .....	11
Si një varr i vetmuar .....	13
Përtej kujtesës .....	14
2. ....	15
Lëkura .....	16
Por ne do ecim .....	17
Një re e dendur .....	19
Një hënë e gjymtuar .....	20
Kur më zë kotësia .....	21
Po vdes një merimangë .....	23
Një ulërimë prej bishe .....	24
Një varkë e moçme .....	26
Lehin edhe yjet .....	27
Kjo natë .....	28
Si një hukamë deti .....	29
Në lotin e thyer të mëngjesit .....	30
Nëna ime moj loke .....	31
Miku im .....	33
Dy herë nga një e gjysmë .....	34
Më lërë më rehat .....	36
Kjo kohë .....	37
Nuk di a është dimër .....	38
Ky shpirti im pagan .....	39
<b>Daullet e një nate - Cikli i dytë</b> .....	41
Sonte do të ecim .....	43
te flokët e erës .....	44
Thonë se .....	45
Vijnë edhe sërish kthehen .....	46
Përtej çdo mundësie .....	47
Dikur vonë kah mbrëmja .....	48

Ky është njeriu .....	49
Ngjyrat .....	50
Në tregtarë ëndrrash .....	51
Ja ky është qyteti im .....	52
Secili prej nesh .....	53
Kjo lojë posa e filluar .....	55
Mbase qante druri .....	56
E vetmja motër e vëllait .....	57
Nëpër rrugët e qytetit të ngrirë .....	58
Si disa gjallesa parahistorike .....	59
Rri varur skeleti i erës .....	60
Kjo udhë e gjatë .....	62
Daullet atë natë .....	64
Ata që u flijuan për ty .....	65
Dhe hija e një druri .....	66
Je një njeri .....	67
2. ....	68
Do të vij deri te ti .....	69
<b>Jashtë mureve të lagështisë - Cikli i tretë</b> .....	71
Atë ditë një arkivol i mbyllur .....	73
2. ....	74
Si zgalemat e rrufeve .....	75
Një dhembje si kjo .....	77
Dilema .....	78
Mëkatet .....	79
Në kokën time rebele .....	80
Pastaj vjen heshtja .....	81
As atje e as këtu .....	82
Më shkruaj një letër .....	84
Por ai burrë .....	85
Jashtë mureve të lagështisë .....	87
Në bëhemi zogj të egër .....	88
fshehurazi kam hyrë .....	89

**Botimin e këtij libri e financon  
DREJTORIA PËR KULTURË, RINI DHE SPORT I  
KUVENDIT KOMUNAL-OBILIQ**

Katalogimi në botim – (CIP)

Biblioteka Kombëtare dhe Universitare e Kosovës

821.18-1

Zaplluzha, Adem

Daullet e një nate / Adem Zaplluzha.

- Kastriot : Shtëpia botuese “ Fahri Fazliu” , 2014.

- 100 f. ; 21 cm.

Daullet e netëve kosovare / Baki Ymeri : f. 5- 9. -  
Adem Zaplluzha : f. 91-97

**ISBN 978-9951-664-01-1**